

I PREMIOS ÁS BOAS PRÁCTICAS EN IGUALDADE DA DEPUTACIÓN DE PONTEVEDRA

A igualdade de oportunidades de mulleres e homes é un dereito fundamental, é o alicerce para acadar un mundo igualitario e equitativo, ademais de ser fundamental para o desenvolvemento sustentable da sociedade.

Así, a promoción da igualdade entre mulleres e homes require adoptar medidas de acción positiva, eficaces e reais, dirixidas a erradicar as situacións de discriminación que por razón de sexo sofren as mulleres e evitar todos aqueles obstáculos que impiden lograr unha participación equilibrada das mulleres e dos homes no ámbito público e privado.

A Deputación de Pontevedra, a través do Servizo de Igualdade, convoca a primeira edición dos Premios ás Boas Prácticas en Igualdade coa finalidade de distinguir as persoas e entidades que realizaron actividades e prácticas eficaces relevantes para conseguir a igualdade real de mulleres e homes. O obxectivo é recoñecer as boas prácticas e as experiencias proveitosas eficaces para estimular as actuacións a favor da igualdade real entre mulleres e homes e a eliminación da violencia machista.

Desde o punto de vista competencial, a igualdade como dereito está recollida nos artigos 9.2 e 14 da Constitución española co obxectivo de alcanzar unha sociedade máis democrática, xusta e solidaria. O principio de igualdade de trato entre mulleres e homes supón a ausencia de calquera discriminación, directa ou indirecta, por razón de xénero en todos os ámbitos da vida, concretamente nas áreas económica, social, laboral, cultural e educativa.

Na Lei orgánica 3/2007, de 22 de marzo, para a igualdade efectiva de mulleres e homes, que se constitúe como o marco xurídico e legal da igualdade entre mulleres e homes no ámbito de todo o Estado español; na Lei orgánica 1/2004, de 28 de decembro, de medidas de protección integral contra a violencia de xénero, e na Lei 7/2023, de 30 de novembro, para a igualdade efectiva de mulleres e homes de Galicia, recóllese que os poderes públicos incorporarán, no marco das súas competencias, medidas tendentes a acadar a igualdade efectiva e impulsarán campañas de información e sensibilización específicas co fin de previr a violencia de xénero.

No ámbito local, no artigo 36.1.d da Lei 7/1985, de 2 de abril, reguladora das bases do réxime local, establécese como competencia propia das deputacións provinciais a

cooperación no fomento do desenvolvemento económico e social e na planificación no territorio provincial.

Do mesmo xeito, no artigo 109.1.d da Lei 5/1997, de 22 de xullo, de Administración local de Galicia, determínanse como competencias propias das deputacións o fomento e a administración dos intereses peculiares da provincia, e no artigo 118.d, a organización de concursos e exposicións e de calquera outra actividade cuxa finalidade sexa o fomento en materia de cultura, educación e deporte.

Por todo o exposto, a Deputación de Pontevedra establece as bases reguladoras da primeira edición destes premios, ao abeiro do establecido na Lei 38/2003, de 17 de novembro, xeral de subvencións (LXS); na Lei 39/2015, de 1 de outubro, do procedemento administrativo común das administracións públicas (LPACAP); na Ordenanza reguladora de subvencións da Deputación de Pontevedra, e na demais normativa de aplicación, de acordo coas seguintes

BASES REGULADORAS

Primeira. Obxecto

Esta convocatoria ten por obxecto convocar e establecer as bases dos I Premios ás Boas Prácticas en Igualdade, nas categorías establecidas na base terceira, coa finalidade de recoñecer publicamente o esforzo realizado polas distintas entidades en materia de igualdade de xénero e contra a violencia machista na provincia de Pontevedra.

Segunda. Finalidade

A finalidade destes premios é distinguir as actividades, proxectos ou programas executados por persoas físicas e entidades, que destaquen como boas prácticas en igualdade de xénero e contra a violencia machista na provincia de Pontevedra.

Enténdese por boas prácticas aquelas cuxos resultados fosen capaces de reducir as situacións de discriminación e tivesen efectos positivos, favorecendo a igualdade entre mulleres e homes e a eliminación da violencia de xénero.

Terceira. Modalidades dos premios e procedemento de concesión

A. Premios

1. Premio ás boas prácticas en materia de igualdade en entidades de iniciativa social.

Nesta categoría premiarase a entidades de iniciativa social sen ánimo de lucro que realicen actividades ou proxectos sobre a igualdade de xénero e/ou a erradicación da violencia de xénero.

2. Premio á mellor iniciativa cultural en materia de igualdade.

Nesta categoría premiarase a persoas físicas e/ou entidades culturais sen ánimo de lucro pola súa actividade a través de actuacións artísticas, teatrais, musicais, literarias para a consecución da igualdade de oportunidades de mulleres e homes.

3. Premio á mellor iniciativa deportiva en igualdade.

Nesta categoría premiarase a persoas físicas e/ou entidades deportivas que fomenten a práctica deportiva en condicións de igualdade entre nenas e nenos e/ou entre persoas adultas, para romper cos estereotipos de xénero existentes e contribuír a erradicar a violencia de xénero no deporte.

4. Premio á mellor iniciativa educativa de igualdade.

Nesta categoría premiarase a centros públicos de educación que teñan incorporado no seu proxecto educativo a igualdade de oportunidades e que a traballen nas distintas etapas educativas e/ou asociacións de pais e nais de alumnado que realicen nos centros educativos actuacións dirixidas tanto ao alumnado coma ao profesorado e ás familias, co fin de fomentar a igualdade de oportunidades entre mulleres e homes e erradicar a violencia de xénero.

B. Distincións honoríficas

Poderán propoñerse as seguintes distincións honoríficas:

1. Persoas físicas que pola súa traxectoria ou labor contribuísen á igualdade de oportunidades das mulleres ou á erradicación da violencia de xénero na provincia de Pontevedra de forma continuada e relevante.
2. Entidades locais da nosa provincia que elaboren ou implementen actuacións, medidas ou prácticas novidasas en materia de igualdade entre mulleres e homes e sobre as diferentes formas de violencia que se exercen sobre as mulleres.

En caso de que non se recibise ningunha candidatura para algunha das modalidades ou de que ningunha delas obtivese a puntuación mínima necesaria para optar aos premios correspondentes, a Comisión de Valoración poderá declarar deserto o premio na devandita modalidade.

O procedemento de concesión levarase a cabo en réxime de concorrencia competitiva e axustarase aos principios de publicidade, transparencia, obxectividade, igualdade e non discriminación, recollidos no artigo 8.3 da LXS.

Cuarta. Contía dos premios e distincións

- A. Os premios que se convocan están dotados cun importe total de dezaseis mil (16.000,00) euros, con cargo á aplicación orzamentaria 24/250.2315.480.06 do Orzamento ordinario do organismo provincial.

Haberá unha dotación económica de catro mil (4.000,00) euros por modalidade. En cada unha delas haberá un primeiro premio de tres mil (3.000,00) euros e un accésit de mil (1.000,00) euros.

Estes premios estarán suxeitos á retención do IRPF correspondente á lexislación vixente no momento da resolución.

O premio pagarase mediante transferencia á conta bancaria indicada pola persoa ou entidade premiada da que sexa titular a beneficiaria.

O xurado reservarase o dereito a declarar deserto algún dos premios.

- B. Distincións honoríficas

Nesta modalidade non se concederán premios económicos. As persoas ou entidades locais recibirán un documento acreditativo da concesión do premio, que constituirá unha declaración formal do recoñecemento ás actividades e proxectos obxecto da convocatoria.

Quinta. Persoas e entidades destinatarias

Poderán ser destinatarias dos premios as persoas físicas ou xurídicas que reúnan os requisitos que se recollen a continuación e que desenvolvan ou desenvolvesen actuacións nalgunha das modalidades previstas na base terceira:

A. Premios

- Persoas físicas que, na data de presentación de solicitudes, estean empadroadas nalgún concello da provincia de Pontevedra ou que teñan unha especial vinculación coa nosa provincia.
- Entidades de iniciativa social, culturais, deportivas sen ánimo de lucro e legalmente constituídas e inscritas no rexistro público correspondente con sede social na provincia de Pontevedra.
- Centros educativos de carácter público da provincia de Pontevedra.
- Asociacións de nais e pais de alumnado (ANPA) dos centros educativos sustentados con fondos públicos da provincia de Pontevedra.
- Estar ao corrente das obrigas tributarias coa Axencia Estatal Tributaria, coa Facenda galega, coa Seguridade Social e coa Deputación de Pontevedra.

B. Distincións honoríficas

- Persoas físicas que na data de presentación de solicitudes estean empadroadas nalgún concello da provincia de Pontevedra ou que teñan unha especial vinculación con esta provincia.
- Entidades locais da provincia de Pontevedra.

Sexta. Presentación das candidaturas e modalidade

Poderán concorrer aos premios as persoas físicas e xurídicas comprendidas na base anterior para cada unha das modalidades propostas. Así mesmo, poderán presentar candidaturas, a favor de terceiras persoas, calquera outra persoa física ou xurídica, as entidades do terceiro sector de acción social e outras entidades públicas ou privadas.

Con carácter excepcional, e de forma motivada, as persoas integrantes da Comisión de Valoración poderán presentar, de oficio, as candidaturas de terceiras persoas á modalidade de distincións honoríficas que, pola súa relevancia, exemplaridade, notoriedade e mérito, estimen procedente. Estas candidaturas someteranse a esta comisión para a súa avaliación en condicións de estrita igualdade coas restantes candidaturas.

As candidaturas aos premios presentaranse por vía electrónica a través do formulario normalizado dispoñible na Sede electrónica da Deputación de Pontevedra (<https://sede.depo.gal>).

As candidaturas ás distincións honoríficas poderán propoñerse por iniciativa de organismos públicos, asociacións de mulleres ou entidades de iniciativa social que non sexan parte beneficiaria destas.

Para a presentación das candidaturas a Sede electrónica admite os certificados electrónicos do sistema Cl@ve, que contempla a utilización de sistemas de identificación baseados en claves concertadas (sistemas de usuario e contrasinal) e certificados electrónicos (incluído o DNle).

Sétima. Prazo para a presentación de candidaturas

As candidaturas presentaranse no prazo dun (1) mes, contado a partir do día seguinte ao da publicación desta convocatoria no *Boletín Oficial da Provincia de Pontevedra* (BOPPO) e na Base de Datos Nacional de Subvencións.

Oitava. Comprobación de datos

Para a tramitación deste procedemento consultarase automaticamente os datos incluídos nos seguintes documentos, elaborados polas administracións públicas:

- NIF das persoas físicas ou xurídicas solicitantes.
- NIF das persoas representantes, no seu caso.
- Certificado de residencia das persoas físicas solicitantes.
- Domicilio fiscal, no caso das persoas xurídicas.
- Certificación de que as persoas ou entidades participantes están ao corrente das súas obrigas coa Axencia Estatal Tributaria, coa Facenda autonómica, coa Seguridade Social e coa Deputación de Pontevedra.

En caso de que se opuxesen ás devanditas consultas, deberán indicalo no cadro habilitado no formulario de inicio e achegar os documentos correspondentes.

Excepcionalmente, no caso de que algunha circunstancia imposibilitase obter estes datos, poderáselles solicitar ás persoas ou entidades interesadas que presenten os documentos correspondentes.

Novena. Documentación

a. Entidades

Xunto coa solicitude deberá presentarse unha memoria do proxecto ou da actividade (máximo de 25 páxinas) desenvolvida pola entidade, que deberá incluír:

- a) Portada (incluídos o título e os datos básicos da entidade).

- b) Índice.
- c) Relación completa das e dos profesionais participantes no proxecto.
- d) Desenvolvemento do proxecto, que incluírá:
 - 1.º Xustificación das actuacións
 - 2.º Obxectivos
 - 3.º Poboación á que vai dirixido
 - 4.º Accións, procedementos e recursos
 - 5.º Temporalización ou calendarización das actuacións
 - 6.º Avaliación do proxecto (cualitativa e cuantitativa)
- e) Valoración dos resultados do proxecto en relación coa promoción da igualdade entre mulleres e homes.
- f) Proxectos de actuación para o futuro como consecuencia do traballo realizado.
- g) Argumentación sobre os méritos que concorren para merecer o premio como boa práctica, que incidiu favorablemente na igualdade entre mulleres e homes e a eliminación da violencia de xénero.
- h) Calquera outra información que se considere necesaria.

b. Persoas físicas

Xunto coa solicitude deberá presentarse a seguinte documentación:

- Memoria xustificativa dos méritos e razóns que motivaron a presentación da proposta (máximo de 2.500 palabras).
- Currículum vitae.
- Outra documentación relevante que considere a persoa solicitante.

Décima. Notificacións

As notificacións de resolucións e actos administrativos practícaranse só por medios electrónicos, nos termos previstos na normativa reguladora do procedemento administrativo común.

As notificacións realizaranse a través da Dirección Electrónica Habilitada única, accesible desde <https://sede.depo.gal>, e entenderanse practicadas no momento en que se acceda ao seu contido e rexeitadas cando transcorresen dez (10) días naturais desde a posta á disposición da notificación sen que se acceda a este.

O sistema remitiralles ás persoas interesadas avisos da posta á disposición das notificacións á conta de correo electrónico indicada na solicitude. Estes avisos non terán, en ningún caso, efectos de notificación practicada e a súa falta non impedirá que a notificación se considere plenamente válida.

Se o envío da notificación electrónica non fose posible por problemas técnicos, a Deputación de Pontevedra practicará a notificación polos medios previstos na normativa reguladora do procedemento administrativo común.

Décimo primeira. Trámites administrativos posteriores á presentación de solicitudes e emenda destas

Se a solicitude non reunise os datos esixidos na convocatoria ou calquera dos previstos no artigo 66 da LPACAP, requiriráselle á entidade interesada, de conformidade co establecido no artigo 68 desta lei, que, nun prazo de dez (10) días hábiles, emende as faltas ou presente os documentos preceptivos, e indicaráselle que, no caso de non facelo, terase por desistida a súa solicitude, que se arquivará sen máis trámites.

Todos os trámites administrativos que as entidades interesadas deban realizar durante este procedemento faranse por medios electrónicos a través do modelo "2887054 Trámites administrativos xenéricos distintos da solicitude", dispoñible en <https://sede.depo.gal>.

A Sede electrónica ten dispoñibles unha serie de modelos xenéricos que as persoas interesadas poden utilizar para realizar as xestións máis habituais durante a tramitación administrativa (representación, emenda da solicitude, alegacións, renuncia ou recursos, entre outros). Estes modelos son comúns para os distintos procedementos e poderán empregarse sempre que a normativa reguladora do procedemento concreto para o que se vaian utilizar non estableza outros modelos específicos. Poderán descargarse para anexalos a unha solicitude ou para realizar trámites sobre outros expedientes e presentalos de forma electrónica ou presencial segundo a normativa reguladora do procedemento de que se trate. No formulario deberase indicar, no seu caso, o procedemento para o que se realiza o trámite. Os modelos están dispoñibles en:

<https://sede.depo.gal/web/public/dynamic/catalogo/tramitesxenericos>

Décimo segunda. Procedemento de concesión e resolución do procedemento

O procedemento de concesión dos premios será o de concorrencia competitiva, previsto no artigo 22 da LXS conforme aos principios de publicidade, transparencia, obxectividade, igualdade e non discriminación, eficacia no cumprimento dos obxectivos e eficiencia na asignación e utilización dos recursos públicos que se sinala no artigo 8.3 da devandita lei.

O procedemento de concesión atenderá ao establecido na LXS e no seu Regulamento de desenvolvemento, coas características que establecen estas bases reguladoras.

A instrución do procedemento corresponderalle á xefa do Servizo de Igualdade.

A concesión aprobaraa o órgano competente, logo da fiscalización da Intervención.

A resolución derivada da decisión do xurado farase pública no BOPPO, de conformidade co establecido no artigo 45 da LPACAP. Así mesmo, tamén se publicará en www.depo.gal. Ambas as publicacións expresarán o réxime de recursos correspondente.

Décimo terceira. Comisión de Valoración

A selección e a concesión dos premios obxecto desta convocatoria realizaranse segundo a proposta dunha comisión de valoración nomeada polo presidente da Deputación ou pola deputada ou deputado en quen delegue.

Esta resolución de nomeamento publicarase na Sede electrónica da Deputación de Pontevedra.

O xurado estará integrado por persoas representantes da institución provincial e por profesionais con experiencia en cada unha das categorías dos premios, que axustarán a súa actuación ao disposto para os órganos colexiados na Lei 40/2015, de 1 de outubro, de réxime xurídico do sector público.

A Comisión de Valoración analizará as candidaturas presentadas e valoraraas tendo en conta a traxectoria e o talento das premiadas, a inclusión da perspectiva de xénero nos seus traballos e o activismo na defensa da igualdade de oportunidades; tamén aquelas iniciativas realizadas co fin de reducir as situacións de discriminación e que tivesen efectos positivos, favorecendo a igualdade entre mulleres e homes e a eliminación da violencia de xénero.

O ditame da Comisión de Valoración será inapelable.

Esta comisión poderá declarar deserto calquera dos premios se considera que ningún dos proxectos presentados reúne os méritos suficientes para ser premiado. Así mesmo, poderá contar coa presenza e coa asistencia de persoas expertas nas diferentes áreas e solicitar tanta información adicional considere oportuna para a súa resolución.

As persoas integrantes da Comisión de Valoración percibirán as indemnizacións correspondentes por gastos de asistencia ás reunións nas que se redacte unha acta, nas mesmas condicións que os cargos electos, cos importes establecidos na base 52.º2.b do Orzamento da Deputación de Pontevedra de 2024. Estes gastos imputaranse á aplicación orzamentaria 24/250.2315.226.99.

Décimo cuarta. Acto de entrega dos premios

Estes premios entregaranse nun acto público, convocado para tal fin, no que se porán en valor a traxectoria das persoas premiadas e o papel destacado das entidades premiadas.

A Deputación de Pontevedra notificaralles ás persoas e entidades premiadas, coa suficiente antelación, a data e mais o lugar de realización da entrega dos premios.

Décimo quinta. Protección de datos

Os datos persoais obtidos neste procedemento serán tratados pola Deputación de Pontevedra, en calidade de órgano responsable, coa finalidade de xestionar este procedemento, verificar os datos e os documentos que a persoa interesada declare na súa solicitude para comprobar a súa exactitude e levar a cabo todas as actuacións administrativas que, no seu caso, deriven.

A lexitimación para o tratamento dos datos baséase no cumprimento dunha tarefa de interese público ou no exercicio de poderes públicos segundo as normas de rango legal recollidas no apartado “normativa aplicable”, dispoñible na ficha de procedemento en <https://sede.depo.gal>.

Os datos persoais obtidos neste procedemento serán obxecto de comunicación ás administracións públicas no exercicio das súas propias competencias ou cando sexa necesario para que a cidadanía poida acceder de forma integral á información relativa a unha materia.

As persoas interesadas poderán acceder, rectificar e suprimir os seus datos, así como exercer outros dereitos ou revogar o consentimento segundo o previsto en <https://depo.gal/proteccion-de-datos/exercicio-de-dereitos>.

Décimo sexta. Réxime xurídico

Ademais de por estas bases, a convocatoria rexerese polas seguintes disposicións:

- Lei 38/2003, de 17 de novembro, xeral de subvencións (LXS).
- Real decreto 887/2006, de 21 de xullo, polo que se aproba o Regulamento da LXS.
- Lei 9/2007, de 13 de xuño, de subvencións de Galicia.
- Ordenanza xeral de subvencións da Deputación de Pontevedra.
- Bases de execución do Orzamento xeral da Deputación de Pontevedra para o exercicio 2024.
- Lei 39/2015, de 1 de outubro, do procedemento administrativo común das administracións públicas (LPACAP).
- Demais lexislación aplicable.